

四庫全書

集部

欽定四庫全書

集部

文憲集卷二十九

詳校官中書臣吳璫

中書臣劉源溥覆勘

總校官降調編修臣倉聖脉

校對官編修臣章崇瀛

謄錄監生臣曾鏞

欽定四庫全書

文憲集卷二十九

明 宋濂 撰

辭

凡三十  
八章

思媿人辭

吾鄉呂成公實接中原文獻之傳公歿始餘百年而其  
學殆絕濂竊病之然公之所學弗畔於孔子之道者也  
欲學孔子當必自公始此生乎公之鄉者所宜深省也

嗟夫公骨雖朽公所著之書猶存古之君子有曠百世而相感者況與公相去又如此之甚近乎聞而知之蓋必有其人矣托物引類作思嫩人辭辭曰

惟嫩人之惜嫵兮賦姱質於自然修蛾規而凝黛兮曼目轉以成睵妥鬢髮而如雲兮屬輔巧以承權纖腰秀頸若鮮卑兮容都曼而體便娟寶璐縈而右繞兮桂徽媚以丰偏懸明月以綴佩兮錯木難而傳冠向瑤臺而微步兮意澹靜以貞閒宓妃之倫折芳馨以相遺兮復

溶與乎江干勢翩翩其褰舉兮若游龍之在淵何人間  
不可以久留兮遂凌厲乎高寒馮道紀以為御兮鍊天  
和而為飡徑驅馭於陰陽兮時上下乎星辰歎予生之  
何晚兮不一覲於芳儀念姱嫿之鮮雙兮邈迴颺而曾  
思歛愁悴而委情兮氣涓灤以如收道苟可以選之兮  
視萬里猶門墀登嶇嶇而騁望兮正晨旭之蒼涼氣曠  
豁而閭朗兮莽山川之縱橫樹輪盤糾而柴席兮蘋草  
藿靡以相望豐狐思羣而咏喙兮文鵲慕類以徐翔企

精爽之不徠兮空雲龍之將將蹇侘傺而望絕兮耀靈  
忽其西藏降崇丘而臨曠野兮循故轍以東歸向闌楯  
而徙倚兮境外嬰而愁內滋新蟾皎以出天兮想纖美  
之曲眉繁星爛而成文兮懷繡帔之陸離蒼瀨霏落而  
無滓兮思玉體之弗緇拂蘭袖而起步兮復經緯乎空  
庭苦鴻鴈之靡靡兮厭羽蟲之薨薨撼戶櫳以悲惻兮  
惕厭容而弗自勝轉曲牖而入堂壇兮辟獨坐對手華  
鐙鐙影搖曳如鳥旻兮象中心之靡寧寒虬狺狺而競

呖兮耳恍聞於楚音疾倒屣以啓闕兮飈鬬葉於枯岑  
縹綿綿而莫抒兮托幽寄於瑤琴琴聲咽而思深兮類  
孤鶴之鳴陰更家嘆以將闌兮斗杓旋而向東舒枕衾  
而就榻兮期夢寐以潛通精氣注以弗釋兮橋有物而  
衡中息纚纚以方微兮魂翕翕而上征造旬始而謁太  
儀兮羣靈續其若蕞氛旄溶以隨焱兮鳳於沛而嬰空  
馭象車而秉虬節兮鞭列缺以斥豐隆豹曩熊幡聿皇  
以奮兮樛流紆譎鬱以相蒙左撫右衛動以絙環兮倏

神倩荆雲滄而雷春回穴幡纚汨以莽歛兮吸嗅肅率  
藹以蒙鴻穆眇眇以前邁兮翩紛紛而弗止莽冥冥以  
無垠兮勢皇皇而迤靡超氛埃而淑郵兮竟按轡乎朱  
陵長麗舉噉以向日兮有赫戲之華文揚芒燥以上焱  
兮粲重離之丹門炫赤玉之寶章兮列八龍之威神歛  
東趨於蒼極兮青瑊紛其並迎羣神衍衍以方饗兮奏  
靈和之鳳笙四酎芬而凍歆兮暈玉色而帶頰揖素威  
以升皓宮兮盼四極之浮浮蓐收顧余而破顏兮錫鏤



瓊之華鉤謂貞白以自守兮合左契於伊周折寒門而  
燭元冥兮朔颼颼以吹裘有夫玄巾而櫟甲兮握靈蛇  
以為驅重陰沍而未啓兮肅玄氛之幽幽四方非不可  
居兮悵所思之莫余都馳兩轂如飛丸兮又滔滔而遐  
逝靈氛告余以吉故兮子何為兮獨悲若彼中天之有  
居兮隔人世之風雨吾將導子之一至兮庶弗憊於恒  
素怡忽荒以從之兮駕剛颼以徑度冒光炎之所忻兮  
緜纚鬱決而不可正視琬薨彤楹屹以上起兮瀏濫弘

尚雲譎而波詭連卷櫬倂杳以軋芴兮歲魁幼眇蠹以  
高峙中洞房之沕穆兮乃媿人之攸居使曼姬為予通  
訊兮儼再拜乎堂垂帟朱扉之洞開兮移玉趾之委蛇  
珠明玉潔不足以為喻兮光照耀乎東西吐芳辭以若  
蘭兮意勤勤而告余曰皇降靈兮昭質弗沫毋染爾穢  
兮昧厥施紉葯襦兮曳蔭旆結蕙纒兮張椒幃勺桂漿  
兮黜蓀麋索胡繩兮畦揭車集衆芳以遠蒸兮羌郁郁  
而斐斐余俯首而敬聽兮書鞶紳以自規海色動而報

曙兮陶去幽而開寤雖嘉辭之盈耳兮邈若人其何處  
遂捫膺以沈思兮顓獨處而繚戾也誠因言以會心兮  
將神交於千載也亘天地而無初終兮惟我民之秉彜  
道弘敷於上下兮必有人而繫之往者固不可作兮幸  
方冊之昭如日參驗於厥躬兮若面命而耳提跼蹐之  
媿媿兮固難齊於六驥能孳孳而弗怠兮亦千里之可  
至余雖質鹵而力單兮敢不沾沾而奮厲帶鉤矩而佩  
衡兮撤葩蒙而祛爵期有形以必踐兮始俯仰而無媿

縱不得媿人以與之游兮又何異同功而並世

予既為此辭嘗

錄一通寄王子克子克蓋有志同予學呂者書以識之庸俟異日各考其學之成也

### 青山辭

青山崔崔白雲溶溶我疑其中仙人所宮風馬雲與霓旌羽幢游行太空翩然相從望而不見使我心忡我本金華牧羊之童口誦藥笈有聲如鐘震撼岩壑無礙不通謫居下土黃塵濛濛五色之文布滿西東秋高露清陟彼危峰呼吸元氣精神內融嘯傲萬物後天而終

雲中辭

黃巖有奇士曰許君弼其字廷輔治周易蔚然以文名  
會天下紛擾輒被鐵衣操蛇矛集兵以禦寇尤能挽強  
命中衆初弗信君設正鵠一百八十步外挾弓矢以往  
轟然一發輒中之乃皆歎服由是多驅馳戎馬間及天  
兵取台州四方次第平大興文治建科目以取士君慨  
然曰聖天子在上可以出而仕矣起應書鄉闈遂取浙  
江第二名君文解去通判沔陽府剽煩劇如庖丁解牛

恢恢乎游刃而有餘地已而復慨然曰予家之東有委羽山其高摩天委羽之下又有挑山焉羣峰相與回環日未出常有雲氣起其間縹緲輕盈如斐羅綿籠罩岵谷如翔如舞絕可愛玩有時下覆欄宇覺此身飄然在雲之中恍欲逐黃鶴仙人吹簫而往來也第以君恩未報不敢決去他時髮種種當掛冠而歸與雲為朋姑以雲中生自號蓋以表其志云夫雲之為物出乎太虛歟然而有忽然而無其變幻有不可測者當長空晴妍紆

徐其興結而為祥鸞散而為綺霞其文采郁如也及其  
黠黠鬱勃鐵馬長驅雷電為之恍惚而甘霖注焉嗚呼  
雲哉何其有類於君也然非雲之類君實君有取於雲  
也樂繁華者贈勺藥以相娛務高潔者貯秋菊以為糧  
物何嘗有心而人自強同之爾予方與君談雲中之趣  
君忽昂然而來顧予言曰弼知誦子之文久矣盍為賦  
雲中辭乎予聞君襟韻洒落得喪一歸于天故其顏四  
時無憂色其號為雲中也亦宜為之辭曰

委羽之山兮雲薄之勢輪囷兮復嶮嵯膚寸而合兮既  
合而復離不崇朝兮雨渺瀰渺瀰兮雲之歸玄功泯泯  
兮邈難知嗟爾雲中之人兮胡不爾思或出兮或處兮  
恒與雲以相期

協晨中寥辭一首

鬼谷仙人畫列禦寇御風圖以獻其師四十二代天師  
真人真人號沖虛子而唐封禦寇之號實曰沖虛此其  
圖之所以作歟瀛竊觀之髯松奮張有風泠泠然起於



其中霞光發舒閃鑠無定禦寇方乘颺間旋龍裳鸞帶  
凌亂不可止遙見神山隱起大瀛海上旭日一點如火  
海濤噴薄迎之濺沫而舞珠景物遼曼令人情塵銷實  
直超鴻濛間嗚呼仙人之畫奇絕矣蓋以婉真人非果  
在於禦寇也真人或飛旆上謁太清排空馭氣靡所不  
之將真人之似禦寇手抑禦寇之同真人乎是未可知  
也濂因造協晨中寥辭一篇真人或咏於淵精之區九  
都衆真當有彈八瓊太皞來和之者庶幾後天而終可

以凋三光者乎至若禦寇寓言旬有五日而後反者微  
旨已備見其書茲可略云辭曰

帝青洞真陽太颺恒鬱敷凝神歛上征行與灝氣俱飛  
輪入溟滓九光開翠萼腰佩白琥囊吻薦紫琳腴曲龍  
有丈人持節下明都噉以八辰祕攝御萬象初陟彼方  
文臺大招許瓊暉廓落黃演烝陽堂明梵樞開明戊己  
功玄契曲晨機羲娥俯倒景流光駐熙夷靈集動千載  
視之若斯須稽首方諸君同餐燕胎芝請授長生籙浩

却以為期

予老矣諸書皆忘去此卷雖久留齋中不克題就今日  
退朝稍早逍遙禁林涼颼飄飄然吹衣神情爽朗有若  
憑虛而行歌天上遂濡毫賦此他日煉丹仙華山中九  
轉成功當與沖虛神游八極握手一笑何翅三千年也

碧嵯亭辭

濂與太常卿魏觀先生游甚久知其為孝敬之人也先  
生間嘗來謂濂曰予家鄂之蒲圻蒲圻有山曰蒲首焉

巉然而起如雲旂翠蕤蕩摩空濛間對峙雙石楹直上  
如笋中敞碧岕千尋嘉卉靈草雜被之紛紅駭綠儼如  
圖畫中我先人愛玩而不忘日支筇步其下或濯纓澗  
底或咏詩坐磐石上或望雲出沒崖谷悠然而忘返遂  
因以碧崖自號時移事遷層崖絕壁雖蒼然不改於舊  
而先人則追逐羣仙於風馬雲輿中弗能一見之予每  
過其下不覺潛然出涕故於宦游所至揭碧崖之名於  
楣間所以志之志之所以思夫親也雖然名之固寓也

而言之則尤寓也曷若親履其地而求先人之遺跡乎  
當今聖人在上方以孝治天下他日幸遂歸田之請築  
亭山麓仍以碧崖名之當風日清美與二三子游其間  
指而言曰彼清泉瀏瀏而斜出者此先人濯纓之處也  
磐石纍纍而可坐者此先人咏詩之地也崖谷沈沈靈  
氣之宣通者此先人望雲出沒之所也一俯一仰無非  
精神之參會非惟慰其遐思抑將藉是以勵夫所學期  
克肖乎先人予雖耄矣此心不敢忘子幸為辭刻諸亭

上何如濂曰傳有之舜食則見堯於羹坐則見堯於牆  
古之上聖猶若斯況下於此者乎人子之於親遇事觸  
物無有不可感勵者況親之昔日所游歷者乎斯亭之  
建當與甄氏思亭並稱其視崇臺芳榭以騁游觀之娛  
者果何如也若先生者豈不為孝敬之人哉先生字杞  
山觀其名也學問富而德行修踐揚中外其善政蓋章  
章云辭曰

崖之雲兮英英其升崖之木兮欣欣其榮悵仙人兮何

之颶風薄而上征豈降精而委祉兮發為休徵三秀之  
茁兮膏露之凝渺長思於無窮兮視一息於千齡金可  
銷而石可泐兮又焉能爽吾之精誠

著存軒辭

并序

瑞安裴中季和以學行推舉典簿成均扁其軒居曰著  
存不忘乎親也御史中丞劉君伯溫嘗為賦詩以寫其  
情予復師伯溫之意演為琴操三解使季和援琴而鼓  
之琴悲而不成聲聲信不能成也嗚呼孝子之思親果

有終極否乎其辭曰

人孰無親兮我親歸于黃土六合之間兮莫過我最苦  
風獵獵兮成音雲族興兮晝陰我親何在兮涕泗霑襟  
我親雖死兮我心不死開目則見兮威儀孔邇何俟當  
祭兮始如見之彼蒼者天兮悠悠我思

求親冥茫兮曷求於身我身即親兮一體之分戰兢保  
持兮厥德克新毫髮不敢愆兮懼傷乎親上慎旃哉兮  
此謂著存



孤憤辭

中州人士有無罪而被廢斥者識與不識咸寃之濂因  
本其志為著孤憤之辭使世之用法不慎者讀焉其或  
知所懼也夫辭曰

哀予生之匪淑兮耿鬱紆其誰語恐此心之難白兮假  
微詞以自吐曩有志乎學古兮指前修以作則非秋蘭  
奚敢紉兮非申椒吾焉食仗所履之正直兮謂無施而  
不可悲世塗之嶮巖兮冒獨中茲危禍胡萋斐之小文

兮竟成之於貝錦剛指方以為圓兮揆人情為已甚伊  
翩翩之公子兮余素得而友之握手以示肺肝兮若斷  
金而弗疑何中心之多變兮一旋踵而弗予識既擠予  
於坑穽兮復彎弓而下石汝面目之無怍兮曾何謀之  
弗深縱禍予其何傷兮吾懼戕汝之良心覩日月之光  
昭兮聞雷霆之隱眈予固不足畏兮汝寧不畏于天  
道微而難索兮斯焉足以責汝彼黃鳥之嚶嚶兮猶求  
友而弗止將七尺之美軀兮乃一禽之不如予固約結

而罔措兮又為汝而歔歔嗟受命之蹇僂兮豈獨汝之  
為尤蛟龍關於深淵兮寧無損於鱗皴汝雖不我陷兮  
予安往而逃囚唯飲泣而無所訴兮傷予罪之不當蒼  
天之至明兮獨不鑑我之幽枉叶於良切皎皎之白璧兮僉  
訾其為燕石也纖纖之素縞兮反謂其如玄漆也欲力  
詆以深文兮其奚患於無辭咎繇之不吾出兮眼有淚  
而誰知誓剖心以自明兮念父母之所遺苟雖經於溝  
瀆兮慮君子之見嗤夜漫漫而不旦兮悲風颯其四來

秋蟲響於空堦兮似助予之悲哀六合之至廣兮寘一身而無所魂魄恍恍若有忘兮雖生存而如死昔公冶之所遭兮夫何有於不仁在縲紲而非罪兮亦魯叟之所稱果自反而弗疚兮縱遇辱其如榮浮雲過而日潔兮春冰釋而水清外累不足以爲懼兮懼吾德之未明意欣欣以超絕兮振冠纓而起行取瑤琴以彈之兮有和行之新聲樂天命以自度兮究年歲而不再更

李都尉字辭

皇上即位之九年以順德公主下嫁于太師李韓公之子駙馬都尉祺初祺小字為總至是詔曰其易以美名翰林諸臣乃定今名以進且字之曰子祺既而子祺請曰祺之名實定於先生祺於先生少嘗受業有師弟子義將何以教之余惟一代之興必有元勳厚德之人出於其間始則佐帷幄決勝負終則坐廟堂而贊治化成大功而享榮名為國家之柱石係天下之重輕若漢之蕭鄼侯宋之趙韓王皆若是矣至於連姻帝室若今太

師則未之有也今太師極人臣之尊為上公之貴而都尉子祺獨能好學慎行敦厚下人發為篇章動有意趣是可謂富貴而好禮又難能也祺之為義為祥為吉子祺固有以致之矣為字實宜雖然尚父有云敬勝怠者吉此守位之事也敢以為勉焉辭曰

氣合運凝天地載清君聖臣明以階治平惟臣謂誰實時元老運籌建略致天之討四方既帖乃戢干戈執政廟堂如漢蕭何非惟執政胙以大國丹書金券俾首百

辟爵則崇侯職則太師左右天子以鎮四夷四夷既安  
君臣交歡上降下承煥乎榮觀柳柳都尉大寵是膺太  
師之子天子之甥際茲風雲依彼日月侃侃都尉不自  
矜伐文駟錦衣其儀孔嘉出入金門不敢笑譁躑躑公  
子交趨兢諾都尉統師屹如山岳斯時之人以恩為祥  
祥則既多惟敬乃將都尉之名曰祺是命何以承之告  
爾克敬庶民不敬且潰乃家況茲世臣不敬謂何凡人  
有身咸有嗜欲敬以攝之形莊氣肅自身而推孝親尊

君動無弗敬乃有譽聞敬勝者吉古有弘訓敬以承祺  
萬福咸順爾克敬矣罔弗盛矣爾之祺矣罔爾違矣太  
師之勛山崇川長敬哉勿忘以繼耿光

馮擇善都督字辭

自昔帝王啓跡之地天必儲精聚靈使英雄謀略之士  
生乎其間以備其驅策而佐其設施及大業既定爵號  
之隆冠于當世褒寵之澤流于子孫若漢唐之豐沛晉  
陽君臣同休蓋蔚乎其盛矣今上皇帝龍飛江淮光啓



神祚于時文武才俊鷹揚虎躍或秉鉞出征或執筆帷  
幄率多江淮之人論功剖符公國侯郡者以數十計若  
郢國馮公其一也郢公定遠人初從上為帳前總制親  
軍都指揮使立功草昧時不幸早卒及上即位追爵為  
公命其子誠侍青宮執業讀書及誠既冠三擢遂僉大  
都督府事而誠之季父初襲郢公職累建大勳亦啓封  
宋國一門二公誠又位在樞府敏事慎職為上信任天  
下榮之誠篤好問學能為詩章以嘗受學于予間來請

曰誠之字曰擇善未達其義願有以教之乃為之辭曰  
江淮之間真主生焉乘風附雲實為英賢侃侃郢公熊  
虎之姿大劍良弓指麾義師孰與其才不賦以壽騏驎  
萬里償于中道壽雖不延有弟克膺有子克承以宏厥  
聲烈烈宋公為郢公弟為都督誠又克為子為他人子  
名實易稱保國承家厥惟難能上則天君下則衆庶苟  
弗以誠曷以宅位惟誠之德貫通于天何感弗應何鬱  
弗宣天以至誠庶物乃育三光無愆四序靡瀆苟或不

誠宜暑而寒人其怨嗟歲功斯瘵況我伊人不誠其可  
矧爾世臣爵祿是荷爾或不誠民胥爾尤誠而無擇為  
僻為謬古訓孔多維人攸踐我將曷從維擇其善惟忠  
與孝則允蹈之維悖維惡絕而弗為蹈之匪艱服以悠  
久木升川增山立海受既擇衆善乃立爾誠乃保厥家  
乃篤鴻慶以之事君為臣之良以之立身為邦之光匪  
光于邦丕爾先人郢公有子聖主有臣

張孟兼字辭

序

國子錄張君生于歲戊寅正月六日以歷推之是月九日始入春則中氣猶居丁丑年之冬其大父府君因以丁命名張君既長聞人先生字曰孟兼兼者何謂臨二歲之中也夫丁在土母為火戊則土也火為文明之候非不灼然有光必變而為土然後生物之功遂張君以辭章名世今將刊其華而食其實乎雖然丁離象也戊坤象也離上而坤下於卦為晉彖有之明出地上順而麗乎大明柔進而上行張君又將自此而升乎方今大

明御世治具畢舉張君益昭其明德發為人文以黼黻  
王度物有不資其成者乎是則兼之之義已或謂殷人  
尚質多以十幹名其與府君之意則夔然殊也張君浦  
陽人有學行與濂為同門朋辭曰

戊為子丁為父火得為土百物之所祖能兼之道為伍

### 趙廣字辭

浦汭趙志道氏衣冠之望族也有子曰廣來求予為之  
字予謂廣之文從广從黃广則因厂為屋象對刺高屋

之形而廣則諧聲也許慎以屋之大者為廣實有容受之義焉請以子容字之何如志道曰善矣乃為之辭曰人之隘也爾則廣之人之拒也爾則容之惟廣惟容吾將見爾德之豐

鄭仲昭字辭

詩云倬彼雲漢昭回于天說者謂雲漢天河也夜晴則天河明其光隨天而轉也雲漢然矣揆於心之靈明其有弗同者乎予友浦汭鄭君以漢為名內翰柳先生字

之曰仲昭間來徵予言予聞制字必有祝於是稽諸詩義而補之以辭辭曰

五禮攸建冠為之先備物祇事無一或讐筮期宿賓列  
器布筵升間皮爵裳錯黃玄組纓屬缺韎韐用延尊甌  
有禁柶解斯甄離肺克鼎乾肺實籩嘉爵既祭工祝乃  
傳造字命辭厥義則宣維天有漢灝氣成川衝角奠軫  
貫乎宿纓夜翳既歛若練在縣隨時運行素色連娟徵  
諸人心同此皦鮮森列萬象徧燭八埏出王游衍與天

周旋有燬鄭君世胄蟬聯十世同煬義聞四傳君實績  
之僉曰象賢圖之回之家政爾肩泰之昭之先緒愈綿  
惟廉則礪惟溫則瑄處乎正中有赫其平漢名昭字佩  
服允堅一理是循顧謬匪偏相彼先民日夕乾乾一事  
或悖六鑒相挺君宜自勗弗懈益虔器服有銘在古則  
然敢補祝辭以代韋弦

黃瑄字辭

宣之為文上從一而下從二從回乃取風回轉以宣通



陰陽之義尋復借為布為緩為明為徧不一而足若加之以玉則又為瑱蓋玉則象形宣則諧聲也爾雅云璧入六寸謂之瑱漢代郊祀則有司奉瑱玉而瑱又通作宣然則瑱玉者亦玉中之最貴者歟先師黃文獻公之嫡孫名瑱濂因字之曰伯宣且勗之曰天地之間貴者為玉賤者為石石譬則小人玉譬則君子也爾瑱出自瓊瑤之林人固曰此玉也非石也玉則玉矣曷益之以璽琢之功乎不然則玉徒玉爾器云乎哉雖然器幸成

矣復局滯於一而未能無施而不當也瑄乎瑄乎其用  
是而自勗乎嗚呼文獻公藏器于身出而薦諸郊廟非  
特器而已也有如辟羨起度凡諸玉之用規矩皆自其  
中出爾瑄慎勿愧之瑄乎瑄乎其用是而自勗乎濂老  
門人也故於瑄不敢褒而敢箴系之以誦曰璧大為瑄  
孕諸石孚尹夜氣吐秋魄薦郊奠廟神鬼格其儀愛出  
犧與帛嬋義配名到幽頤爾性爾繕靡朝夕予言服膺  
宜無斁

臧士幾字辭

臧君哲字曰文濬密人也以儀曹屬時詔為司隸然其  
為人秀穎而嗜學賢士大夫愛之頗謂其名若字皆盛  
德事殊非所以自稱蓋更之君來請於予予摘程子哲  
人知幾之義字曰士幾幾者善惡之發榮辱之主也可  
不慎歟慎之如何曰誠而已矣作字辭辭曰

心神變化乘氣機弩牙既幹鈞石隨或黑或白乃異岐  
君子防之樹城碑嚴以金鼓列旌旗百體從令志則熙

尚慎旃哉無殆而

黃仁淵靜字辭

有序

建安才俊士曰黃生名汶仁負超羣之資朝出受易於  
部使者陳孟龍至暮抵舍復質所疑於仲父居德亦奇  
男子年十六時中私試高等諸老生不中譁于庭居德  
因請面試上官前譁者執筆不能下面頸發赤以出以  
故生內外皆得師學之日進如水湧雲集洪武辛亥秋  
有司賢之以生名上福建行中書試藝棘闈八府之士

充貢者二百而司文衡者又前進士林以順吳尚志郭  
麟江惟志也取舍甚嚴或懼不獲在茲選及榜出三十  
人中而生名居其四遂為易經諸義之冠生之年始弱  
齡耳明年會試南宮銓曹急於用才不俟再試擢奉常  
贊禮郎階入八品有識之士無不為生榮雖余亦愛生  
甚時以問學勗之生因執經從余學間拱手而言曰仁  
初名文仁有司援例以文犯周西伯之謚加水於其左  
及解名上中書吏以白右丞相汪公公曰仁之義甚弘

無所不包其可冠以汶字乎宜去之先達因取魯論仁者靜之言字以淵靜願先生詳發其義嗚呼考亭朱子釋此至矣余何以言為雖然不可無以答生之意生之賦資固超羣而求仁之方不可不力也為序其事而申之以辭曰

仁體凝重屹弗遷振古雄峙如山然生意周流踵至顛一息有虧用則愆爾生心澄靜若淵萬象森列具不偏返觀沖漠無後先其機或動矢發弦雲行雨施出自天

神功不宰超虛玄全體大用昭以宣上師周孔下淵騫  
縱不及聖肯下賢流光不駐若電煥生其夙夜加勉旃

張肯字辭

古者冠而字敬其名也三加之後必為字辭以祝之或  
稽於經或據於史凡可以繕性提身者無不可也由此  
觀之非惟敬其名抑且以敬其身能敬其身則成人之  
道具矣姑蘇張君芸已敦實有學之士也嘗名其子曰  
肯又以繼孟字之蓋取書大誥之義也雖加冠於首而

未有為之辭者請予補之余雖不獲從大賓之後與聞酌醴之事然與芸已友也輒陳所見而告之其辭曰

冠禮之重為敬其名苟非其人禮弗虛行伊張氏子世傳以經名子曰肯厥義則宏吾為爾陳聳耳而聽有法於先爾基爾楹有菑于前爾播爾營勿違厥時必將必迎勿闕其成載厲載興茲為善繼父事是繩前者有作後或匪承此謂悖則溺於淪寔規既我蹈矩復我程此謂順德令譽日增二塗之間美惡所形擇善固執弗撓



而傾況爾秀穎如稼之青翹然獨異如木之榮棟梁斯  
任倉困載盈上慎旃哉學惟烝烝余言止矣爾其服膺

王宗器字辭

王生璉字宗器其先太原人今家濟南之長山器局沈  
凝而學問精密洪武五年以易經舉進士山東名列第  
三既上南宮未試皇上召見便殿親命題賦詩詩成稱  
旨擢史館編修賜以冠服選入禁中文華堂肄業詔翰  
林老臣為師同時而進者凡十又七人車駕時臨策勵

之且取其文品評其優劣日命光祿寺給膳羞酒漿每當食青宮暨親王迭為之主而璉等侍飯於左右冬夏賜衣各一襲復有白金弓矢鞍馬之頒蓋不一而足近又使璉攝御史廉察河南迨歸奏對益稱旨上悅謂近臣曰文華堂諸生如璉等者皆朕異日將相材也其期望之重如此璉嘗從余學故來以字辭為請予因序璉遭逢之盛於首而著命名制字之義於辭璉能聽之必上不負於國恩下不負於所學矣辭曰

宗廟之器貴重寶殊夏有四璉殷稱六瑚周云八簋異  
名同符其貴斯何珠玉為飾其重斯何盛以黍稷嚴奉  
明禋神鬼是格惟端木氏才堪三卿文章外見以言語  
稱汝器見許載諸聖經今生既長局度純亮發為辭章  
大河奔放器字璉名父師所望出逢盛治講學禁中天  
日照臨以煦以融以達其衷用廓其蒙學之茂矣川之  
流矣材之秀矣木之脩矣蚤夜孜孜道是求矣豸冠巍  
峩巡行洛河貪夫夜逃良士笑歌君子之為君子之多

學無止功勿畫斯善辟彼行塗足不留踐百里至千所  
見逾遠志安於近行局一偏筌罔為鑪豆難充邇規模  
卑狹世則病旃德藏于身動無不被厥用能周由體斯  
具生尚勗焉庶幾不器

王生致遠冠字祝辭

虎林王生其幼也父命名曰驥及年寢長加元服于  
首大賓字之曰致遠蓋取梁徐勉所謂人中驥驥必致  
千里之言也按說文驥千里馬也孫陽所相者其字從

馬冀則諧聲夫千里馬不常有以謂世之奇才亦未嘗  
數見也以生名若字觀之則父師所期望者不亦深且  
長哉予雖不及與聞三加酌醴敢抽蕪思而弘敷其義  
生宜聽之母忽其辭曰

古者體物取義孔殷麟紀其瑞鳳揚其文表厥茂實載  
敷清芬其一惟馬之族本非一類八尺為龍千里曰驥因

生有別挺材見異其二伊驥斯何墮地不毛虎文彪炳龍

骨陂陀天機趨騰絕山飲河其三當其奮飛神行電逝若

滅若沒一日千里晨燕晡越視同遊戲

其四

誰其似之渥

注之姿肉角飛黃逸氣纖離天閑翔翔玉臺裴回

其五

奚

官善馴是澡是拂秣以美薦飫以香粒筐惡蜃洩慮無

弗及

其六

物尚有茲人胡不如天賦權奇孰不自攄口噴

紅光長鳴九衢

其七

豈無王良俾其振迅未必鹽車能厄

神駿三羸五駑過者誰問

其八

生游藝府逸思超羣剪水

為神製霞作文亦既應書名達帝宸

其九

侍經藩王出入

禁禦宮袍時頒太宮致飭寵賚之隆揆古無愧

其十

以利

天下易經有辭取譬奔蹏漢詔以之任重道遠生寧勿  
思其十曷以思之朝夕兢惕匪力足矜所稱惟德予言  
非誣勗之無數其十

宋惟善字辭

宋氏自京兆遷汴又自汴分遷吳興虎林虎林有名善  
字惟善者實承其後吳興則再遷金華而予之遠裔也  
予與惟善為同宗予侍講禁林日惟善以學行貢諸朝  
皇上親擢為給事中朝夕在帝左右時被顧問恩寵有

加焉已而兼靖江王府錄事擢監察御史改知濟寧府  
未上陞參山東承宣布政司政事予與惟善為同朝瀕  
行惟善來言曰善以字辭為請已二年矣叔父文墨之  
冗日弗暇治因未敢累執事今將有遠行叔父寧終靳  
一辭乎予笑曰惟善通書工辭章經緯參伍燦然成文  
持節行州縣彰善癉惡又愜乎物情是文學政事舉勝  
於人縱予有言將何有裨於惟善乎惟善請之益力予  
不能牢讓因稽其命名制字之義綴之以辭辭曰



陰陽迭運道寓其中繼之者善性成乎躬其善伊何化  
育之妙陽行陰具萬理樞要是曰天道體用弗遺式昭  
化源用樹學基有倬君子夙著徽美內功既加外聞益  
侈積久發弘上簡帝衷峻爵穹官日致顯融君恩如天  
無不覆燾昧昧思之非忠莫報往佐方嶽審其政機大  
見設施春煦秋威孰滯盍疏孰蠹盍剪孰才盍登自邇  
及遠此非外鑠實善之推成已成人庶其在茲我著我  
辭徵厥名字揭諸座隅以示籤史

補張馮加冠字辭

有序

瑞安張生馮宋金部郎中聲道諸孫也以文學薦於朝  
擢奉常贊禮郎奉常所典祀天神饗人鬼祭地祇之禮  
其責任為甚重馮能周施佐助而無越禮愆度君子稱  
之馮當冠時大賓字之曰子翼而未有造祝辭者邇來  
監祀廣西行中書省參知政事黃君子邕嘗為推說字  
義而序之馮事予頗謹間復以祝辭為請予按士冠禮  
載其三加之辭甚具辭古也而字說則今也予雖不敏

弗能從大賓與聞制字之義馮之意難固拒也遂黽勉以補其辭辭曰

冠而有字為敬其名曷為敬之期學之凝學將焉施莫重夫祭大嘏之受因神所致孰有賢行慎擇為尸豫撰厥几庶堪馮依豈惟佐食宿有命戒皇尸戾止益虔弗懈侶侶工祝左承右趨既贊道之復扶助之馮之謂何如神斯據翼之謂何如鳥展翅百靈繽紛儼乎若淵洞徹上下精白一心詩咏卷阿歸于孝德放諸四海準是

為則爾職贊禮陟降廟郊周折圓方弗訾絲毛非志之  
醇疇能及此宜勵其功慎終如始自此而推泉達火然  
孝親忠君其道一原內涵外充壹循乎敬大本既敦末  
罔不正爾有長才發軔在茲何遠弗屆何福弗宜探名  
索字孳孳不已賢亦何人希之則是

鄭氏三子加冠命字祝辭

有序

浦陽孝義之門曰鄭氏其十世之長仲德甫筮得柔日  
宿余為賓將冠其從子木杲果命親與之周旋降升以

成三加之禮於是稽名定義製字命之夫平土有叢為  
林因字木曰叔林日在木上為杲因字杲曰叔昇丈  
夫致果為毅因字果曰叔毅命已遂通祝之以辭辭  
曰

三加三醺既備禮儀昭告爾字各宜聽之木從地生含  
和茹滋孤撐非貴叢生乃奇蔚若鄧林陰陽蔽虧欲構  
清廟掄材實宜毋學樗櫟擁腫離疏為世鄙賤工師莫  
窺木其勗哉夙夜克治杲杲出日新陽則微及昇扶桑

其光陸離婉諸靈局皦然弗緇群昏既斂洞察毫絲毋  
若小夫中霄而趨墮索塗陷於洿痺杲尚勗哉賢哲  
自期人之立志樹德為基唯果而毅篤行不疑譬之大  
將建以鼓旗奮矛爭先矯亢欲飛毋習巽懦如脂如韋  
聞過罔悛媿嬰委佗果尚勗哉振厲有為爾三子者昧  
昧以思彼蒼者天體物無遺或出或入靡不爾隨尚滌  
爾心一髮不私履善蹈道君子之歸苟務口耳言從行  
違奚翅犢禽安於鬚眉世之恒流父子異炊脫有不善

衆方見嗤況爾旌門十葉聚居名播寰宇彤筆所書尤  
當戰惕若臨險戲尊厥祖武全其秉彜群翔于堂東垣  
西麓獨行于庭左矩右規庶幾無愧七尺之軀予年耄  
矣百艱備罹涉事既廣理能真知諄諄爾誨辭肯貢諛  
請書座右視如嚴師

鄭柏加冠祝辭

浦陽江上有旌義之家曰鄭氏其子姓多從余游有名  
消者執經為最久近又攜其子柏請曰柏加巾時賓字

之曰叔端而祝辭尚闕願先生追補之余聞記禮之家  
以竹箭有筠松柏有心居天下之大端故貫四時而不  
改柯易葉蓋喻人之得禮則內諧而外無怨旨哉言乎  
今柏之門內外邕穆且十葉聚食矣非禮有以管攝之  
惡免無乖繆哉夫端者本也釋者謂四物最得氣之本  
用此而不變傷以端為字配名實宜於是申之以辭辭  
曰

齊家之道人情為由修禮以耕耒耜用宣婚其蕪穢灌



以淵泉既功既施遲彼有年逮其大備食之肥鮮稽類  
取譬柏號最堅暨于松筠同得氣原青貫四時柯蕊葉  
芊外柔內澤本固末綿我挈其綱物莫敢先藉禮為政  
孰謂不然民則底定天和斯全釋回增美植正斥偏情  
通上下曾無間言揆諸稼事理不少愆爾生鄭柏紳綏  
蟬聯由禮達義世已十傳煦然春溫嘉生紫駢旌書煒  
煌降自九天爾生已冠學維箋箋朱唇漆鬣玉潔珠圓  
元賓加布三祝于筵取端配名勗爾致虔當為鬯曰與

鬱回旋勿隨鮮葩街奇競妍此謂敦本確執弗遷循名  
責實夙夜乾乾祝辭止斯爾其勉旃

補臨川危安子定加冠祝辭

有序

冠者責成人之道其禮自天子至于諸侯卿大夫士各  
有隆殺之節儀文雖已失傳唯士冠禮獨存告廟筮期  
宿賓命贊弁有皮爵之等裳有黃玄之錯器有尊甒柶  
解之用鼎有乾肺離肺之實三加而彌尊制字以敬名  
其為禮甚嚴矣夫何故事親從兄忠君敬長之行望其

有所成也古昔盛時以冠為諸禮之首者其職此之由歟自冠禮久廢風頽俗靡冥然夜行如擿埴而索塗君子未嘗不為之永慨也臨川危生安清敏好修為文辭亦整綴可觀嘗從郡諸生肄業成均學士大夫多延譽之其師曾先生旦初為字曰子定來謁禁林求予為之說予謂字之有說說文解字備述之矣何暇人言哉然三加成禮之後既命之字必造辭以祝之是猶可為也於是歷序冠禮之嚴定字代名者為甚重繼掇大學知

止之義而申之以辭生慎聽之其將躋君子之域矣乎  
其辭曰

人之初生父命其名弱齡攸屆乃以字稱此非彌文實  
厚彛經四行之責用底于成其一爾生名安以定為字稽

諸聖經數列其義必先知止始莫厥志射有正鵠直趨  
而逐其二方其未定逐物而搖紛紜舛戾水湧風飄及既

定止類鑒孔昭事至則應順而不膠其三曷為致斯因靜

之故靜為動基理罔弗具辟地博厚發育萬彙區萌畢

達隨風而布其靜主乎內靈局廓然靡隱靡顯隨寓而

安天光昭煥人滓將刊漸獲所止斯不為難其惟古之

學明體適用出輔邦家瑞若麟鳳逮及後世葩藻是弄

誇多鬬靡有如聚訟其昔我臨川學者所宗仰視陸子

其猶神龍駕風鞭霆雨于太空被其澤者碩大而充其

憫彼夸毗以幸喪質直究本心皦如出日微言猶存可

以尋繹生居其鄉敢不自力其爾生長矣煜如秀榮濯

濯而明英英而貞從師受經喙其至精亦既有文五色

交紫

其九

我後賓贊不與酌醴今補祝辭庸申規厲行固

宜篤知亦須至安定其中聖域可企

其十

東湖先生方君招魂辭

至正元年春東湖先生年過九十貌加癯而神益腴一  
旦合賢士大夫于庭先生被古冠衣出肅賓升堂已復  
揖賓咸東向坐顧外孫楊恒執豆籩乃從容舉觴而揚  
言曰老夫耄矣其去人間世不遠矣私自念陰陽之運  
相摩相盪而人實藉是以成形有生者必有死暫聚者

必終散嘗昧昧思之上自頭顱齒髮下自肩髀腰膂不知何者為可藉何者為可恒乃欲長生坐閱世而不死乎予每讀古書見所謂豪傑之士不可勝數或提三尺之劍擁百萬兵喑噤叱咤而江水為之湧起或掉三寸舌高軒結駟游騁於諸侯之間亦足以懾強而下敵若而人其材畧雄矣其精魄勁矣吾將求而與之游則已蕩為飄氛而無致詰矣嗚呼世之人凡以有涯之身與無涯敵者皆可悲也是以榮啓期林類之徒有見乎此

或被索鼓琴或行畦拾穗雖至老死不以戚戚少嬰其  
心予竊慕之嘗聞古有虞殯之章蓋羣歌以輓櫬于塗  
與其施諸死後之鬼孰若予親見之賢士大夫若不予  
棄宜賦詩以輓予予當乘安車而出使善音者道予而  
歌予且擊輪為節以應之是未必遽減於秦淮海也賢  
士大夫若從予言願舉此解為賢士大夫壽衆皆曰然  
先生既行解已又舉解言曰賢士大夫固輓我矣予又  
聞古之人有遭讒放逐者或閔其魂魄離散而不復還



作辭以招之其人初未嘗死也予雖無放逐之憂而其精神皆已斃竭筋骨皆已罷憊顧未死耳幸未死有能辭以招我庶幾翩然自適與夫既死而有靈亦御雲龍而一下聽之又未必不輟然而笑也此非屬吾景濂而誰為願舉此解為吾景濂壽濂又曰然於是賢士大夫執解以酢先生且各謨歌詩一章以進濂因製為招魂辭云先生名寀字德載姓方氏越之暨陽人其行大畧見於延陵吳公所著碑銘辭曰魂兮既徠毋遠征些上

下八極皆朦冥些華山如雲倚空青些下有芝房炳明  
靈些白閒綺疏紫檀扃些銅龍承樞吐赤瑛些繡帷高  
褰耀輜輶些綠蛇衛轂若流星些溥熬熊軀溢鼎鉶些  
狼燭凝膏如玉晶些九霞玄冠五綵綈些麟衫麕裘光  
熒熒些珎璜合節鏘瓏玲些離灑巢和一齊鳴些沂韶  
飄飄發繁聲些趙舞激風肖霓旂些秦歌嫚迴近懸瓔  
些室中百具無一不精些中天化居能及此清寧些魂  
兮歸徠不越故庭些

哀志士辭

奇俊之士無世不生特時人弗識之或識之而弗能用  
或用之而弗能盡其才所以聲光不流於當時事業不  
白於後世予竊悲之庚寅之夏因覽元好問所錄入之  
諸儒自辛愿而下凡五人見其氣節剛方言論磊落實  
所謂奇俊之士者也雖其行事或未能無過終非齷齪  
陳腐懣不振者所可冀及萬一然恨其有志而不能遂  
也因掇其大畧隸於各人之下又從而哀之以辭

辛愿敬之福昌人年二十五始知讀書音義有不通者  
搜訪百至必通而後已由是博極羣書且善於文辭尤  
以是非黑白自任每讀人詩必為探原委發凡例解絡  
脉審音節辨清濁權輕重片善不掩微類必指如老吏  
斷獄文峻網密絲毛不相貸雖貽人怒罵不恤也性疎  
宕不脩威儀貴人延客愿麻衣草履足脰赤露坦然於  
其間劇談豪飲旁若無人家甚貧衆離嗷嗷張口待哺  
素負高氣又不能從俗俯仰其枯槁憔悴流離頓踣一

假詩以鳴雖百沮之餘其耿耿自信者不少變元光初  
李獻能元好問在孟津愿往見之獻能為設美饌愿放  
筴嘆曰平生飽食有數每見吾二弟必得嘉食明日道  
路中又當與老飢相抗去矣會有一日辛老子僵仆柳  
泉韓城之間以天地為棺槨日月為含槨狐狸亦可螻  
蟻亦可耳聞者悲之辭曰天生爾才胡不汝騁麻衣如  
墨下不掩脛下不掩脛不過寒我我食無所我生其可  
水豈無藻山豈無薇苟非我有我敢采之市魁屠伯彼

豈無食我腹雖虛我腰肯折抱節而終我則奚憾烏鳶  
螻蟻上下何辨爾貧固甚爾守則多不義而富其如爾  
何

李汾字長源平晉人曠達不羈好以奇節自許避亂入  
關關中無一人敢與相軒輊者元光末用薦書得從事  
史館從事職名謂之書寫特抄書小史耳汾素高亢不  
肯屈世乃今以斗食故人以府史畜之殊不自聊館中  
諸人又多新進小生史家凡例或未能盡知就其所長

有不滿汾一笑故刊修之際汾在傍則蓄縮慘沮握筆  
不能下汾正襟危坐誦左丘明司馬遷文數百言音吐  
甚洪暢誦畢顧四坐曰看秉筆諸人積不平乃以嫚罵  
官長訟于有司證左相半踰年不能決右丞師中遣東  
曹掾置酒和解之尋入闕驅馬來京師日以馬價佐歡  
道逢怨家則畫地大數而去會恒山公武仙在鄧汾往  
說之署行尚書省講議官既而參知政事思烈與仙相  
異同懼汾言論遂害之汾孝友廉介過人者甚多寧寒

餓而死終不作寒乞聲向人又善為詩清壯磊落有幽  
并豪俠慷慨之氣人以其稱焉辭曰奎星光光今何其  
昏大河東流遑恤無人金匱石室藏我冊書豈伊羣兒  
所堪穢之我言弗信弗信從汝丘明雖鬼其文不死既  
不我嘉覆謂我僭我視我觚有淚如霰黃霧四塞黑白  
誰分彩鳳無華山狸有文悠悠蒼天曷其有常自古莫  
不然爾又何傷

劉昂霄字景玄一字委房陵川人聰敏絕人或戲取市



家日厯鱗雜米鹽者令讀之一過無脫遺者故其學無  
所不窺六經百氏外世譜官制與兵家成敗為最詳為  
人細瘦似不能勝衣好橫策兀坐掉頭吟諷幅巾褰袖談  
辭如雲四筵聳聽噤不得語遇其飲酒眼花耳熱後其  
鋒愈不可當不知去古談士為遠近餘子不論也嘗用  
門資敘調慶陽軍器庫使不就諸公方薦試宏辭未幾  
卒辭曰陋儒拘拘以簡為常目視環堵不知有四方狂  
瀾既倒誰復迴之氣蓋一世獨爾能之上自黃虞下迨

五季一隙必燭何有幽邃或觸其機談辭如雲誰非男子有舌無聲我豈誇多我豈鬪靡一物不知吾儒所恥獨立千古上邈寥絕爾身雖窮爾名豈減

雷淵字希顏別字季默渾源人崇慶二年進士授涇州錄事不赴改東平府錄事以勞績遙領東阿縣令東平河朔重兵處也驕將悍卒不可制淵出入軍中偃然不為屈不數月家有淵畫像雖大將亦不敢以書生遇之調徐州觀察判官名為荆王府文學兼記室參軍轉應

奉翰林文字同知制誥兼史院編修官拜監察御史巡  
行河南榜掠賊吏風采凜凜蔡下一兵與權貴人有連  
時以藥毒民家牛馬以小直脅取之淵捕得數以前後  
罪杖殺之老幼聚觀交口稱快然亦坐是失官尋用宰  
相侯莘卿薦除太學博士再遷應奉終于翰林脩撰累  
官大中大夫先是正大間元兵突入倒迴谷勢甚張平  
章為公逆擊之突騎退走填壓谷溪中不可勝算諸將  
議不定釋之勿追淵請急殲之主兵者不能用後聞北

兵狼狽而西馬多不暇入御始悔不用淵言淵學甚博  
文甚奇為人軀幹雄偉髯張口哆顏渥丹眼如望洋遇  
不平則疾惡之氣見於顏間或嚼齒大罵不休雖痛自  
摧折卒亦不能變也食兼三四人飲至數斗不亂生平  
慕孔融田疇陳元龍之為人雖其文章號一代不數人  
在淵仍為餘事耳淵之友高廷玉李純甫亦以奇節自  
負人號之為三傑云辭曰爾心之勁爾氣之剛嫉惡如  
仇不問暴強將指出巡面冷如鐵霜簡所加邪蒿即折

才豈止斯兵筭又長眼見千里孰曰不明志不獲伸多  
士短氣其書徒存九原能起埃風四來式脂式韋有髯  
如戟妾婦之為我俗之昏誰復繼君茫茫九州敢謂無  
人

雷琯字伯威坊州人志英邁博學能文以薦書從事史  
館調八作司使初并州李汾與琯同在館中以高蹇得  
罪琯往送之信陵攜酒酬魏公子墳握手痛飲後去客  
陽夏以鞭擊酒壺作楚聲歌自言去國十年甲兵滿天

地短衣足馬來自西北將起楚漢間奇才劍客與游而  
不可得當是時金已遷汴太河以東北盡山東西抵關  
輔大軍長驅徙少壯數萬人殺之居庸關外自黃河洛  
陽三門析津至丕之源雀鎮凡二千餘里潼關一帶西  
南邊山大小關隘亦一千餘里各分地界統以總帥夜  
則傳令坐守冬則燃草敲冰兼以關輔大飢秦民死者  
相枕藉瑄皆悲之作商歌十章寫其情曰秦子父母國  
也而一至此乎竟淚下不能食乃出奇策白宰相宰相

不能聽瑄去不知所之辭曰北風泱泱海水為竭俯窺  
神京不隔一髮舉鞭擊壺歌聲愈苦來自西北短衣疋  
馬我淚既盡以血繼之天門九重曾莫聞知孰秉國鈞  
我將自薦反謂我狂斥去如箭商顏有芝暄暄蕤蕤可  
以葆神可以樂飢長往不返誰甘幽深赤日在天廉明  
我心

葉深道哀辭

烏傷葉君深道字逢原沈確而有文生與予友也死則

哀之以辭

綢山孤張華川瀦水動溶漾元精煦嫗育喬蟬聯為里  
望回鑾有疏輓漕有猷效忠亮君出其後丕續遺緒宜  
炫燭胡為躔延決瘍潰疹關難鬯長始知學優游厭飫  
敢虛曠朝蒐莫擿會其肯繁瑳其航業成歿畜如矢藏  
箴弓入韞室廬枵然有衣一襲履一量不隨游塵上下  
鼓舞相頡頏嗟予蹇僣感今思古徒慨忼辟諸豫章絜  
之百圍逢哲匠愧彼紛紜妄廁壘洗忝盆盎抽闕啓鐫



浸漬薰蒸予饋相天胡難知木邪制土病腫脹叫呶輾  
轉晝夜變幻熱以瘡疾勢漸革魂氣隨風恣飛颺揆齒  
綴足髻笄纓中禮是傍善人宜壽卒就黃壚永淪喪相  
此小夫露牙揚已學豪放手足胡越豈知五倫為世障  
胡不顛厥反使亂真日趨妄嗚呼噫嘻君今遊矣予焉  
仗制服總麻存慕音容哭相向玄雲漫漫涼風蕭蕭吹  
總帳我詞之哀君知不知倍悲愴

蔣季高哀辭

至正丁酉秋七月壬午瀟畏暑被髮行青松間或有客  
自東陽來曰蔣季高氏歿矣瀟聞已哭之哀哭已進客  
問狀客曰前月戊辰季高以事如縣中已已即有滯下  
之疾晝夜之行餘百乂之熱發體中如火其兄伯康懼  
亟呼翳視之翳至脈已絕矣自己已至今月甲戌僅六  
日而遽至於亡瀟聞已復哭之哀乃尤天曰嗚呼悲乎  
不知何繇而夭吾季高乎使季高其行負天地愧神明  
天之可也季高恂恂儒者非其道弗言也非其道弗為

也言其事親則孝而恭處伯仲則穆而和交朋友則信而貞遇族姻則惇而莊接間黨則惠而慈求其致夫之繇無有也今季高何為乃遘爾乎豈高高在上果不可必乎抑其視夢夢不能別善惡乎所謂天道常與善人其尚足徵乎嗚呼悲乎初濂年二十餘頗嗜學聞文懿許公弟子三衢方先生以性理學講授東陽之南深徒步往從之游先生所主蓋蔣君子晦家子晦季高父也濂因獲交季高父子聞時季高尚未冠即能執經問難

進退雍容肌肉若玉雪可愛歲幾何既哭其父今又哭  
季高焉則夫人世如傳舍者可不信乎嗚呼悲乎季高  
篤意于學方先生既歿復笈師事侍講黃公會濂亦執洒  
掃之役於公門與季高交益密季高日出所為文皆雅  
馴可傳誦濂甚敬之每一會綉湖上輒握手吐肺肝間  
酒酣氣豪競出慷慨背俗語季高喜益與濂親季高善  
辨說衮衮數千言不休濂不能屈每務力皆勝之於是  
各大笑而止之且曰良會不可數一嘻笑一怒罵皆別

後之相思當時出此言亦以為常豈知別後之相思者  
乃為死後之相哀乎心雖如鐵石其不為季高一酸辛  
乎嗚呼悲乎去年之春季高有書來曰東西二峴山無  
君足跡十年矣縱不為吾行其可貽山靈之所笑乎瀟  
方閉戶著書跬步弗妄出不及如季高言瀟所居實浦  
內青蘿山山中林樾蒼潤孤猿野鶴見人了無驚猜意  
而梅花泉又極可飲瀟自念雖不能為季高往季高清  
俊士折簡招之或可一來當共飲水哦詩或投壺白雲

間亦一樂也豈知季高遽棄瀛而長逝乎峴山之蒼翠  
固在眼寧不對之墮淚如襄陽乎雖欲重登顧後瞻前  
而季高不見又寧不為之感慨乎嗚呼悲乎季高之太  
夫人年踰八十母夫人髮亦種種而三子方纍纍在疚  
長者僅七齡幼者尚居乳哺中惻然可念季高之死兩  
目能遽瞑乎嗚呼悲乎季高已矣瀛將撫季高羣行為  
書以信後世遠有故未及為姑撰哀辭一通焚之於墓  
以寫中心之悲季高其能有知乎抑無知乎岱嶽可移

瀛海可填瀛之哀吾季高者尚何時而已乎嗚呼悲乎  
嗚呼悲乎季高諱允叔季高其字也卒時年二十九云  
辭曰

有木蕤蕤兮嗚呼將鬯其施兮嗚呼霜雪何為兮嗚呼  
竟從而折之兮嗚呼天者不可知兮嗚呼千載之悲兮  
嗚呼

郭淵哀辭

郭淵字濟川六人唐汾陽王子儀裔也宋季羣盜起淵

聚族共保若一障曰蔡堡六人依焉天下已定民為占  
籍吏撓之民見縣有為丞相客者無敢呵相教為丞相  
奴淵謂民民賤生民也奴重人奴也使世世為人奴與  
王民孰愈民愧而止後樹吏吏務休息民而奴客困皆  
來謝曰微君幾不免大德末准大饑淵作饘粥食之生  
者甚眾是時人多鬻子自救淵取困甚者假子養之十  
餘年皆為娶婦居數歲大穰一朝縱之曰若事吾良苦  
及時歸毋久留為也皆涕泣曰公生我今驅我安之願



留終公身淵曰毋悲後吾子孫不省將以汝為奴卒縱  
之有人貰酒飲西家者已醉而出遺所齎金于門淵適  
見藏棄俟之明日遺金人從西求金西家誠不知怒以  
為欺求之急西家怒益閉其人困即欲自剄方爭淵聞  
之遽出呼其人與之所遺金人皆驚始保蔡堡羣少年  
共劫一人將殺之淵呵曰此何罪至殺羣少年曰此疑  
狙伺為謀而將襲我故殺之耳曰吾所為相保以生誠  
惡死也今疑而殺人禍將及羣少年怒淵私計奪之力

且追殺之乃曰吾代之贖何如羣少年喜遂免之後至  
昇昇市中有戴粗妝盤鬻於市者遇淵置戴盤叩頭泣  
曰今日遇公天也幸臨過我我有母皆願見公謝淵固  
辭假以為誤去之市上老人嘆曰世稱長者此真是耶  
初六界北邊民習兵少文淵與父諗以詩書俎豆為業  
人慕之多化者至今六多儒淵既卒其孫言抱李光孝  
所造墓文請瀛哀以辭瀛未及為言客死豫章可悲也  
已始言與瀛游語及當世輒瞑目嚼齒語皆驚人聽者

掩耳避去及操筆綴辭則海蜃吐樓而芝輦翠輦隱見空濛間可怖愕言誠奇男子濂故剛孝光文為辭哀淵且附見言事以見可哀不特淵也辭曰

有聞其先熙以申有紹其後文以彬何過其施祿以屯

王季楚哀辭

王仲淮季楚越人也其父良嘗檢校江浙行中書政成謁選京師時季楚年方二十餘請從行既至有多季楚才者薦其名遼陽行中書授季楚大寧路儒學正未幾

以病卒檢校君哭之甚哀既請國子監丞陳公旅撰銘  
揭墓上復謂其甥方泗曰予深哀仲淮既不能壽而又  
客死其二子基始八歲塾始一歲僂然也仲淮有知其  
能瞑目乎聞汝交友多能文盍求辭以哀仲淮且慰我  
泗來為瀟言瀟竊悲之初瀟見季楚於泗家眉目秀整  
每言輒牽引史傳幾若貫通者瀟方意其必進用于時  
今若是世之人欲以智力相雄長而不知止者果何如  
耶辭曰

冥冥玄化孰尸其權胡予其才而不予其年嗚呼

陳子章哀辭

嗚呼吾子章竟止於斯邪始予游學諸暨之白湖而子章實來予因獲與子章交當是時四方來者類多紃綺之子喜眩文綉以自媚人爭悅趨之獨予之貧短衣纔能至胥冷處前廡下四壁蕭然誰復見顧者惟子章與予燈影相望而讀書之聲相接也予時學未聞道心頗不能平子章嘗慷慨厲子曰子量隘矣是焉足以汙子

哉子章好使氣人稍加昵白眼視之至其去乃已予因用子章厲子者厲之子章矍然謝曰是善教我子章自是與予居至驩也予既還金華子章亦去越二年子再見子章於烏傷更相勞苦子章握手顧予曰子之貧尚爾邪子但力學天殆不能貧子也予觀子章貌加壯其厲子一如諸暨時未幾子復西還金華又二年子束書寓浦陽子章聞之喜以書來曰予昔在諸暨與子居僅四月而別在烏傷未十日而別今子來浦陽浦陽子父

母邦也予家距予之所寓不百里庶幾與予少相羊乎  
予亦喜當與子章時相見也又三年子章未嘗一來子  
竊怪之因詢子章所常往來者具道子章病咯血氣厭  
厭不振予謂是疾勢雖迫人得良醫可已未始為吾子  
章憂又四年子章竟死嗚呼吾子章竟止於斯邪予之  
交友固多矣如子章者寧幾人哉積二十年之久僅能  
再見之蓋以子章春秋始壯予雖少長亦不過二三年  
其與子章游未晚也豈知子章遽先予而棄去乎予蚤

知子章若是又敢憂百里之遠不與子章周旋乎子章已矣孰能相子之善孰能指子之疵哉予雖欲不衰子章不可得已因從而著其辭子章諱璋姓陳氏子章字也浦陽人辭曰

已乎子章天賦爾材而鍾爾精宜乎輝赫其聲光振拔其華英不秩登於百石亦名薦於九卿奈之何單襦短褐不知珪組之貴藜羹糗飯莫沾鼎餼之榮雖足勩乎敝屣神憊乎篝燈竟不少用而遂潛輝韜迹於泉扃則



吾子章何如勿生已乎子章白楊萋萋宿草莽莽悲泉  
咽而不流寒雲鬱而不聚以吾子章之才之淑而遽下  
制於一坏之土寧不使予撫遺文而增慨想音容而惻  
楚也耶嗚呼唏矣

哭張教授父子辭

瀛同縣張公繼祖力學而尚志操少讀魯仲連傳見其  
排難解紛歎曰士當如是而已大德中縣有桀黠吏挾  
重辟害民民慙怯莫敢觸其鋒公直之部使者時吏方

抱案在庭公面疏其奸卒置于法延祐間郡上公才行  
署雙溪書院山長考第成遂調瀏陽州學教授公為復  
侵疆稽其步畝刻石學宮會守貳闕太府檄公攝州事  
時歲荐禔道殣相枕藉方下令勸分公為設方畧使持  
券者左入受粟者右出竟事帖帖無譁居二年以大父  
喪棄官歸卒其子道生力學如其父屢應進士舉不利  
困頓殊甚適余觀以監察御史行部浙東觀同舍生也  
召見相勞苦薦為武夷書院山長未幾亦卒初濂年幼

時見公公即相器重與為賓主禮俾同道生師事城南  
聞人先生逮今粗知學而不陷於小人之域者皆公賜  
也瀟既往哭公曾未幾何又哭道生焉雖石人猶當墮  
淚近抱疾衽席間中夜尤念公父子不能置起篝火濡  
毫申之以辭辭曰

番番良士僅以教施才不盡展人期有兒兒今死矣吁  
其悲

哭王架閣辭

有序

王君樞字德潤濟寧金鄉人祖仁義烏丞父端溧水州  
稅務大使母劉氏君少警敏人物又魁傑嘗掀髯自詫  
曰王樞不尋功名功名當自來逼王樞爾豈有錐在布  
囊而末不見者耶遂學治經試進士不中即棄去攻法  
家書為衢處二府吏尋補書吏浙東廉訪使者府遷浙  
西名上江南行御史臺辟察院書吏已而貢入中臺察  
院出調浙西道肅政廉訪司照磨兼承發架閣裨贊憲  
政人器其材因會酒言忤御史銜之以事中君下符逮

就吏君坐樓上歎曰男子頭可斫膝不可屈死則死肯  
與獄吏對乎遂拔刀自刎左右急救君已仆地血滂然  
流君妻劉及子僧僧忍泣具棺斂載入金華即城北五  
里藏焉蓋君自幼寓金華又以女妻縣人江演兵起山  
東道絕不能歸故君喪來葬而妻子皆來依江初余入  
郡從聞人先生學君同日至與之語又知同庚戌生人  
相驩也畫摩切經藝晚則捉手同游行或縱談大噱憤  
墮地弗顧或聯詩纔脫口即促繼之遲則罰昏鼓動鑿

鑿始歸日以為常一旦去為吏余遂不以書記通有自  
浙水西至者出君手書相勞苦且曰吾薦子於方嶽大  
臣行授子校官矣子能為我一出乎余以書謝復固辭  
居亡何聞君死矣余之辭君者非託此以為名高竊自  
念貧賤士何往不自得吾固不忘故人余足一動人必  
病余以為挾且私是以弗能往視君俟君他日歸休御  
款段馬候君青霞白水間未晚也嗚呼孰知君之遽去  
余而死矣乎使知君之遽死也縱百千其人以為私以

為挾朝夕迭提余耳而噪之余尚何恤必能謁君虎林  
之上矣今復何言哉今復何言哉君既不可見乃絮酒  
裹雞走哭君之墓僧僧知余至哭迎于途僂然也余心  
益百折不自勝造為哀辭一通以洩余情雖然余情其  
得而盡洩乎君卒時年四十七至正甲申九月十二日  
云辭曰

犧尊青黃嘉禾之災樗大蔽牛不以為材使君非材行  
已昧昧過者弗睨孰得而害君既材矣人誰舍旃高位

疾顛理之必然氓之蚩蚩匪材曷治君仕則當不仕無  
義孰不顯融君門而凶豈仕之尤祗繫其逢所逢者時  
固有通塞亦命使之君復何惑物忌大剛不缺則利自  
君取之命復何云君若居柔觸物惟忍非惟保名身何  
能殞從古有言柔則詭隨縱生千齡非君所宜君死雖  
亟君膝不屈君氣凜然千古莫奪人孰不死君死則寧  
尚可謂君鴻毛之輕君何用哀我哀有以天方壽君君  
則自死我苟無罪誰敢死余一朝之忿惜不爾思妻子



煢煢東西顛沛君在九泉亦將自悔我則深悲豈直悲  
君悲法之隳法既隳矣君宜長逝彼豸斯冠天亦不畏

悲海東辭

王山鄭先生原善字復初延祐名進士起家德興丞轉  
處州錄事有異政為衆所忌遭誣構去官尋以疾卒臨  
川危君太樸病執法者不得其平為著悲海東辭濂亦  
繼作時元統癸酉冬十月丁亥也

我悲海東我涕拭矣善人云瘁邦其棘矣倬彼昊天冒

此下民彰善瘴惡胡莫之懲冥冥其晝不見出日飄飄  
雨風墮我家室家室墮止邦國危止豈遽危之遂將自  
通大君維河冢宰維舟卿士維楫烝庶維徒上下相力  
厥載孔速苟不是念不膠則覆維彼哲人化為螟螣維  
彼愚人猶如鬼蜮鬼蜮戢戢巧為我賊螟螣僥僥蝕我  
黍苗我民我牧唯恐傷只彼豺伊兕敢為民瘠既啜其  
旨復盪其髓我寘我法孰云能已淑爾君子綉衣孔揚  
有瑒蔥珩有節斯煌不我能勗覆謂我夾詈我繫我絕

不畏明訾彼鸞鳳見藻是食有振者麟邪蒿為室式紛  
式錯動罔不忒嗚呼昊天曷其有極甡甡其鹿乃索之  
江中林喬喬乃求其魴顛倒眩瞽以逞無良嗚呼昊天  
曷其有常無然惛亂無然惱淫無然回遁以虹我心爾  
之悖矣民胥害矣爾之迪矣民相憚矣勿曰丘陵崇不  
可夷勿曰淵冰堅不可摧忽為平陸忽若流澌誰與爾  
謀曾不爾思謂爾醉止黜然無知爾不用酒何德之違  
謂爾蠱止上下卒迷日用飲食不愆厥初其止蘧蘧其

行踽踽其慘喆喆其威虺虺我淚既竭繼之以血百海  
其深莫喻我心我生不辰伊誰之云無越我墻我垣我  
藩無菜我田我田我廩天命有定我將我怨爾無人怨  
我爾用歌乃塤乃篪乃琴乃瑟乃磬乃笙以樂其音以  
樂其音實獲我心我我墮山山則有樗彼淮者淵淵則  
有魚匪今獨然振古如茲我苟不樂不樂奚為

廣漢難辭

難古禮也周人三時皆行之春冬之季難難陰氣也仲

秋之月難難陽氣也蓋二氣或佚厲將乘之為災故難  
以止焉其制命方相氏帥百隸索室區疫以逐之又磔  
牲以禳四方之神漢襲周制而其儀加詳選中黃門子  
弟百二十人為侂子赤幘阜制執鼗方相黃金四目蒙  
熊皮玄衣朱裳執戈揚盾十二獸有衣毛骨中黃門行  
之冗從僕射將之以逐惡鬼於禁中夜漏上水朝臣會  
侍中尚書御史謁者虎賁羽林郎將執事皆赤幘陞衛  
乘輿御前殿黃門令奏曰侂子請備逐疫於是中黃門

倡偃子和其辭凡八十言繼作方相與十二獸儻謹呼  
徧前後省者三持炬火送疫出端門門外騎士以次傳  
火棄碓水中自漢至今朝廷之難雖廢而民間猶有存  
者先臘一日巷陌社隸飾鬼神貌御五色龍虎文衣巡  
門擊鼓而難之予惡其言鄙褻因疏古者用難之意復  
廣漢辭使習焉其辭曰

陽陰乘化左右而行日歷昴畢得積屍大陵其氣勃芒  
更涉虛危墳墓西司鬼官攸房厲附強陰而降于釁殃

咨爾十二神宣其威良哉突劒亢脾胃食虎甲作食  
雄伯食彪騰簡食不祥攪諸食咎伯奇食夢祖明强梁  
共食磔死寄生委隨食觀錯斷食巨剗其腎腸窮奇騰  
根同享於蠱毋使害傷咨爾十二神鍛爾戎兵出輶四  
方吮厲之益以代酒漿解厲之肌以充糗糧絲厲之臙  
織以為衣裳斥除慝陰暢回明陽乾坤載清物楙民印  
惟爾神之功神或不獲上帝是明急急如律令

補雩壇祝舞歌辭

周官有司巫掌羣巫之政令若國大旱則帥巫而舞雩  
漢法夏不雨祀竈毋舉土功更火浚井暴金于壇杵臼  
于術為四通之壇於邑南門外方七尺植赤繒七其神  
蚩尤祭之赤雄雞七玄酒具清酒搏脯祝齋三日服赤  
衣拜跪陳祝辭以丙丁日為赤火龍一長七丈又為小  
龍六長三丈於南方皆南向壯者七人皆齋三日服赤  
衣而舞之司空嗇夫亦齋三日服赤衣而立之鑿社而  
通之閭外之溝取五蝦蟇錯置社之中池方七尺深一



尺酒脯祭齋衣赤陳祝如初取三歲雄雞豕猪燔之四  
通神宇令民闔里南門開里北門幸得雨報以豚一酒  
鹽黍財足以茅為席然周制久廢典午以降漢法亦不  
行而祝辭尤闕歲丙申夏旱羣巫雩于山川之神予既  
書其事授之復補其詞使巫歌舞焉

於泰鴻冒下民動以化時屈伸煜朱鳥萬物甄元則害  
陽畢屯土膏耗蓊欲瘠田畷奔勢維磧壇四通俊明神  
神中臨勃如煙鬯嘉錫燦若羅繭握薦豕炳脊蕭濯鬱

金菊芳菲氣上延合溟濛洞五精貫八牒茫無外莽脩  
脩門沆碣駕以焱俯下土無不釗

鬱行風羽輪翔玄黃變慘復爽衆孳集元景章優然存  
索之亡爍陰明迴叢陽符翹襟逝弗忘崇明裡成穡功  
憑紺筵巖以印應上公與天通植赤繒驂紅龍左列缺  
右豐隆流火降鉅若鴻鬼婦劉散為風灑靈注徧四封  
函斯活穎茸茸衆維魚兆已從融祉暉毓宵氓甫田阜  
物豫成風平平綽以行人專與鬼眈蠻耿曜振需充盈

神心暢樂茫良四寓綏萬國洋洽大康慶昭膺

楊刺史廟迎享送神歌辭

浦陽雞冠山上有古神祠相傳祠漢交州刺史楊侯侯  
縣人也名扶字聖儀累官皆有惠政侯歿已千載民以  
雨暘禱輒應是侯之神在天猶不棄於吾民也吾民其  
可忘於侯乎濂雖不敏為撰迎享送神之辭俾邦人歲  
時歌以祀侯其辭曰

紛溶溶眺天門白蜺出雜雲敷翮我靈整脩駕車登登

般裔裔翮我靈降潜場回聽興與之鷄翮我靈變陽陰  
奔以放光淫淫翮我靈續如唐神鬼衛鳥翼張

紛溶溶一

神筵啓混朱黃愉以康悅芒芒奄靈車莫芳耐爵行千  
流若雨奄靈車蕙為有饗且飫以舞歌奄靈車靈已醉  
廣宣延無不備奄靈車樂無極神山高高可測

神筵啓二

氣翼翼欲上升指青雲化為文靈之旋疾如風從西虎

導東龍神之旋髯長逝凌紫青瑤光下靈之旋兆逢暢  
景已滅猶放惠靈之旋錫我祐沛若雲雨下土

氛翼翼三

題辭

菊坡新卷題辭

當塗陶君用高蓋出於晉徵士元亮之裔凡宦轍所臨  
必效前人種菊花滿坡當萬木搖落時花始秀拔低昂  
枝上若赤金所鑄錢頗可玩用高公退之餘酌酒與花

對恍然如在柴桑籬落間殆忘其章綬之榮案牘之煩  
也或者疑之曰仕者樂乎朝市故馳而弗息隱者慕於  
山林故往而不返有若水之與火未易合也昔者元亮  
遭時孔艱不能為五斗米折腰向鄉里小兒因有托於  
菊而逃焉耳今用高則不然生逢今有道之朝亦既由  
憲史檢校中書而主畫於秋官矣衆咸以致君澤民期  
之用高則留情於菊若將與世相違者無乃不可乎嗚  
呼是何言歟是何言歟觀人之道不于其迹而于其心

迹固朝市也而心則不忘乎山林謂之吏而隱可也迹或滯乎山林之中而其心則豔華趨榮無一息之不思市朝苟謂之為隱孰能信之況君子之出處可仕則仕可隱則隱初何容智力於其間哉設使元亮當今之時將不能不仕而用高生於元亮之世似亦不得不隱也世之人學元亮者多矣皆在乎去位之後用高則見於在官之時此蓋魯男子之善學柳下惠者也用高誠賢乎哉予固不敢以用高方之元亮也以其志之或同而

他人未必能知也聊相與一言之并作采菊之辭以遺  
用高曰我采我菊露其和矣今我不樂鬢其皤矣鬢其  
皤矣吾行歌矣我菊我采露其晞止今我不樂白日馳  
止白日馳止吾顏衰止歌罷用高攬衣而起曰贈子言  
者盈三帙矣子頗能知予之志曷為書于新卷之端俾  
詩家者流繼之他日約子於三徑間俯仰西風歌此辭  
而餐落英顧不美歟予不敢固辭用高通儒術為人仁  
厚士林中多稱之云



羅鄂州小集題辭

有倬羅公家于歙邦幼名曰愿冠字為端良其父吏部  
內外踐馭春秋之學與胡氏抗衡生子凡六皆能辭章  
公居其五尤赫赫有芒既收世科歷仕縣州出刺武昌  
阜蓋朱襮績用翕以張夫自五季以來文氣日卑宋室  
龍興篤生哲師汶陽浚其源二尹導之元城倡於前范  
張和之逮于廬陵日粹以夷臨川南豐眉山父子同燄  
而聯輝清寧協順功用發揮精氣充斥暢達蕤綏變化

合神而光景弗虧奈何王輒既南涉于偏頗哀俗羣趨  
以事決科浮聲切響駢言儼辭襲謬而踵訛公挺其間  
弗徇弗阿濯其孽痼障其頽波謂六經之作如日行天  
不可以軋摩唯秦暨漢是則是效接其遐軌而視法在  
軻然而畜之不弘則動之弗振涵志今古潛神典墳玩  
陰陽之交察海嶽之文藪治亂之變通典禮之津以至  
稗官虞初旁行敷落鳥獸蟲魚之倫凡可以資博識者  
咸區別而彙分力思精索從莫達晨立功以凝將通乎

鬼神故其形諸篇翰鑰啓繭抽高雅精鍊莫之與逮喬  
嶽嶢然上凌太清而陋夫土丘戴冕執圭屹若山立而  
異於卉裘棠溪之金美則為鏐干將之鐵百鍛始道視  
彼蝕鏹腐鉛負乎不侔考亭朱子取法魯騶發人瑕類  
一髮必讐獨推公文而弗舍者以協理之微幽嗚呼公  
既逝矣遺文四行唯於東南榮如列星遭時不平遂壞  
於兵其諸孫宣明賢而有徵懼懸黎之鏹彩結綠之沈  
英復鏤於梓以震其聲以開其冥以錡於衆聽濂也不

敏幼誦公文蒼白無成搏朽壤以代礪不壓亦傾揉敗  
駭以為孤莫使之綢其瞻公之製作猶應龍之降升區  
區贊述何繫重輕姑序其作者之意於首簡使後生小

子知

豪傑之士

不為衰俗所囿而雄渾之作或當與秦

漢并

見

文憲集卷二十九